

Fatschenta extrachantunala daventa impurtanta

La Banca Chantunala Grischuna ha preschentà cifras da fatschenta solidas da l'onn precedent

ANDREAS CADONAU/FMR

■ **Bunas notas dal timun da la Banca Chantunala Grischuna vers il sustegn statal instradà a favur da l'economia turmentada da la pandemia. Presidi e gestium da la banca han preschentà gievgia passada a Curia ils resultads da fatschenta da l'onn passà.** «Liquidità è l'aorta da l'economia». E per segirar quella liquidità han chantun e Confederaziun mess a disposiziun daners sco garantizas da credits e contribuziuns a fond perdu per cas da direzza. La Banca Chantunala Grischuna è sa participada cun 161,7 milliuns francs als uschenumnads credits da Covid-19. Quai han ils responsabels da la banca explitgà cun preschentar las cifras da fatschenta da l'onn 2020. Els han fatg quai la gievgia passada da Cuira anora via emissiun directa.

A favur da gastronomia e hotellaria

Tenor las explicaziuns dal CEO da la Banca Chantunala Grischuna, *Daniel Fust*, è la plipart dals daners ida en la sparta turistica, per gronda part en la gastronomia e hotellaria: «Impurtantas spartas da l'economia grischuna e fermamain pertutgadas da la pandemia.» Daniel Fust na quinta mumentan betg cun in grond ristg da perder quels credits. Divers sajan gia vegnids restituids. A vista mesauna quinta il timun da la Banca Chantunala tuttina cun ina verificaziun entaifer la bransch turistica. Vul dir che betg tut ils manaschis turistics vegnian a surmontar la crisa. «Tant pli impurtant èsi da segirar l'existenza dals manaschis sauns ed abels da cuntinuar.» Ed a quellastentas vul la Banca Chantunala contribuir, sco quai ch'il president *Peter Fanconi* ed il CEO, Daniel Fust han punctuà.



La Banca Chantunala Grischuna stat sin in fundament finanziel solid. Per tegnair ses fundament sto la banca cultivar spazis da fatschenta ordaifer il chantun.

FOTO GKB.CH

In chantun memia stretg

Tuttina daventa il chantun Grischun memia stretg per la Banca Chantunala e sias finamiras economicas. Las fatschentas ordaifer l'intschess grischun han contribuì essenzial a l'augment dals emprests concedi l'onn passà. Emprests s'augmentads per passa trais procent, ina summa da 647.5 milliuns francs. Daniel Fust ha concedi che la dumonda per emprest sa reducechia en il chantun Grischun. «La Banca Chantunala Grischuna è conscienta dal svilup demographic ed economic en pliras parts dal chantun.» Ludà ha il president Peter Fanconi las participaziuns cun ulteriurs instituts privats che contribueschian als buns affars. El ha fatg a savair che la banca vegnia vinavant a persequitar la strategia da sa participar ad autras instituziuns. «Dentant sulet sche nus essan tschient per tschient segirs che sa participar è d'avantatg per nus e per noss partenaris.» Opziuns en questa direcziun vesa el tuttavia en il proxim temp.

Gudogn pli bass che l'onn 2019

Il gudogn da la fatschenta operativa 2020 e sa reduci levamain per 6,8 procent sin 188,2 milliuns francs vers l'onn 2019. Daniel Fust ha discurri dad in onn extraordinari 2019, principalmain pervia da la fiera dad aczias fitg animada. Gronda paisa tschenta la Banca Chantunala da tegnair ina exemplarica cumpart da chapital agen che sa chatta cun passa 20 procent sur la limita pretendida da 12 procent. Sa legrar po era la cassa chantunala che retschaiva 87.3 milliuns francs dal gudogn, 440 francs per abitant. Ed investir vul la banca vinavant en il Grischun, a Cuira ed en ils centers regiunals, actualmain a Tavau.